

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10) i člana 54. stav 1. Zakona o budžetima u Federaciji Bosne i Hercegovine („Službene novine Federacije BiH“, broj: 102/13, 9/14, 13/14, 8/15, 91/15 i 102/15), Vlada Zeničko-dobojskog kantona na 77. sjednici, održanoj 15.11.2016. godine, d o n o s i

ODLUKU

o utvrđivanju postupka davanja prethodne saglasnosti za popunu upražnjenih radnih mjesta

Član 1. (Predmet)

Ovom odlukom utvrđuje se postupak davanja prethodne saglasnosti za popunu upražnjenih radnih mjesta, koji je obavezan za sve rukovodioce koji taj status imaju u kantonalnim organima državne službe i drugim organima, institucijama i ustanovama, u kojima se plaće i druge naknade zaposlenih u cjelosti ili djelimično finansiraju iz Budžeta Zeničko-dobojskog kantona (u daljem tekstu: rukovodilac organa).

Član 2. (Dostavljanje zahtjeva Ministarstvu finansija)

(1) Rukovodilac organa koji želi popuniti upražnjeno radno mjesto dužan je Ministarstvu finansija Zeničko-dobojskog kantona dostaviti pismeni zahtjev, u kojem obavezno navodi:

- a) tačan naziv upražnjenog radnog mjesta i broj izvršilaca s kojim se popunjava to radno mjesto,
- b) na koji način je radno mjesto ostalo upražnjeno (odlazak ranijeg zaposlenika u penziju, sporazumni raskid radnog odnosa, otkaz, smrtni slučaj, i sl., odnosno bolovanje i trudničko odsustvo, u slučaju da se radi o privremeno upražnjenom radnom mjestu),
- c) način popune upražnjenog radnog mjesta (radni odnos na određeno ili neodređeno vrijeme, ugovor o privremenim i povremenim poslovima, ugovor o radu sa pripravnikom ili ugovor o stručnom osposobljavanju bez zasnivanja radnog odnosa),
- d) da su planirana sredstva za plaće i naknade za traženi broj izvršilaca, i
- e) da li se mogu poslovi upražnjenog radnog mjesta obavljati preraspodjelom poslova na ostale zaposlenike u istom organu.

(2) Rukovodilac organa je dužan Ministarstvu finansija Zeničko-dobojskog kantona uz zahtjev iz stava (1) ovog člana, dostaviti i popunjen, potpisan i ovjeren obrazac (koji predstavlja prilog broj 1. ove odluke), sa slijedećim podacima:

- a) postojeći (trenutni) broj zaposlenih, broj izvršilaca za koje su sredstva planirana u budžetu Kantona za tekuću godinu i broj izvršilaca za koje je podnesen zahtjev za popunu radnog mjesta,
- b) ukupan iznos finansijskih sredstava koji je za organ koji podnosi zahtjev planiran za plaće i naknade u budžetu Kantona za tekuću godinu, iznos finansijskih sredstava koji se izdvaja iz budžeta Kantona za plaće i naknade za postojeći (trenutni) broj zaposlenih i ukupan iznos finansijskih sredstava koji je potreban za plaće i naknade za izvršioce za koje se traži popuna upražnjenih radnih mjesta.

c) izjavu da popuna upražnjenih radnih mjesta neće iziskivati izdvajanje dodatnih finansijskih sredstava u odnosu na sredstva planirana u budžetu Kantona za tekuću godinu.

(3) Rukovodilac organa (izuzev rukovodioca ministarstva, samostalne uprave, upravne organizacije i službe) uz zahtjev obavezno dostavlja i mišljenje svoga resornog ministarstva o opravdanosti popune upražnjenog radnog mjesta sa stanovništa poboljšanja rada navedenog organa i o tome da li su planirana sredstva za plaće i naknade za popunu upražnjenog radnog mjesta.

(4) Zahtjev za popunu radnog mjesta se može podnijeti samo ukoliko su finansijska sredstva za popunu upražnjenog radnog mjesta već obezbijeđena u budžetu Zeničko-dobojskog kantona za tekuću godinu i ukoliko je pribavljeno pozitivno mišljenje resornog ministarstva iz stava (3) ovog člana.

Član 3. (Mišljenje Ministarstva finansija)

(1) Na osnovu zahtjeva rukovodioca organa, Ministarstvo finansija daje mišljenje o planiranim sredstvima za plaće i naknade za popunu upražnjenih radnih mjesta.

(2) Ministarstvo finansija neće razmatrati zahtjeve za popunu radnih mjesta koji ne sadrže sve elemente iz člana 2. stav (1) ove odluke, uz koje nije dostavljen popunjeni obrazac iz člana 2. stav (2) ove odluke i koji ne ispunjavaju uslove propisane članom 2. stav (4) ove odluke, te će iste vraćati podnosiocima zahtjeva kao nepotpune.

Član 4. (Dostava zahtjeva Komisiji)

Pismeni zahtjev za popunu upražnjenog radnog mjesta, sa elementima navedenim u člana 2. stav (1) ove odluke, zajedno sa popunjenim obrascem iz člana 2. stav (2) ove odluke, mišljenjem Ministarstva finansija i mišljenjem resornog ministarstva, rukovodilac organa dostavlja Komisiji za davanje prethodne saglasnosti za popunu upražnjenih radnih mjesta u kantonalnim organima uprave i ostalim organima/ustanovama u kojima se plaće i druge naknade zaposlenih u cjelosti ili djelimično finansiraju iz Budžeta Zeničko-dobojskog kantona (u daljem tekstu: Komisija).

Član 5. (Sastav Komisije)

- (1) Komisiju iz člana 4. ove odluke, čine:
 - a) Premijer Zeničko-dobojskog kantona,
 - b) Ministar Ministarstva finansija, i
 - c) Ministar Ministarstva za pravosuđe i upravu.

(2) Tehničke poslove za Komisiju obavlja Ured Premijera.

(3) Na osnovu zahtjeva rukovodioca organa, te mišljenja Ministarstva finansija i mišljenja resornog ministarstva (iz člana 2. stav (3) ove odluke), Komisija donosi odluku o davanju saglasnosti za popunu upražnjenog radnog mjesta ili odluku kojom se odbija davanje saglasnosti za popunu upražnjenog radnog mjesta.

Član 6. (Posljedice nepoštivanja odluke)

(1) Budžetski korisnici su odgovorni za zakonito, namjensko, efikasno i ekonomično raspolaganje budžetskim sredstvima.

(2) Rukovodilac organa, koji u ših listama za obračun i isplatu plaća i naknada, navede lica, koja su bez prethodne saglasnosti Komisije primljena u radni odnos ili su angažovana po osnovu ugovora o privremenim i povremenim poslovima, ugovora o radu sa pripravnikom ili ugovora o stručnom osposobljavanju bez zasnivanja radnog odnosa, lično je odgovoran za postupanje suprotno odredbama ove odluke.

Član 7.
(Primjena odluke)

(1) Ova odluka se primjenjuje na sve organe/ustanove u kojima se plaće i druge naknade zaposlenih u cjelosti ili djelimično finansiraju iz Budžeta Zeničko-dobojskog kantona i obavezni su ga se, kao prethodnog postupka, pridržavati prilikom popune upražnjenih radnih mjesta, kako slijedi:

- a) Rukovodilac kantonalnog organa uprave, upravne organizacije i službe (ministar, sekretar, direktor uprave/ustanove/službe, i sl.),
- b) Predsjednik suda sa područja Zeničko-dobojskog kantona, Glavni kantonalni tužilac,
- c) Kantonalni pravobranilac,
- d) Rektor Univerziteta,
- e) Direktor ustanove kulture, drugog organa, ustanove i institucije u kojoj se plaće i druge naknade zaposlenih u cjelosti ili djelimično finansiraju iz Budžeta Zeničko-dobojskog kantona.

(2) Izuzetno, odredbe ove odluke se ne odnose na popunu upražnjenih radnih mjesta u osnovnim i srednjim školama sa područja Zeničko-dobojskog kantona, u kojima se plaće i druge naknade zaposlenih u cjelosti ili djelimično finansiraju iz Budžeta Zeničko-dobojskog kantona, a za koje saglasnost za popunu upražnjenih radnih mjesta daje Ministarstvo za obrazovanje, nauku, kulturu i sport, u skladu sa posebnom procedurom utvrđenom drugim propisima.

Član 8.
(Stavljanje van snage zaključka)

Stupanjem na snagu ove odluke stavlja se van snage Zaključak o utvrđivanju postupka davanja prethodne saglasnosti za popunjavanje upražnjenih radnih mjesta u kantonalnim organima uprave i ostalim organima/ustanovama koji se u cjelosti ili djelimične finansiraju iz Budžeta Zeničko-dobojskog kantona, broj: 02-34-9842/11 od 07.04.2011. godine.

Član 9.
(Stupanje na snagu odluke)

Ova odluka stupa na snagu danom donošenja i objavit će se u „Službenim novinama Zeničko-dobojskog kantona“.

Broj: 02- 34-18863/16.

Datum, 15.11.2016. godine

Z e n i c a

PREMIJER

Miralem Galijašević

DOSTAVLJENO:

1x Ministarstvima i drugim tijelima kantonalne uprave,

1x Ustanovama koje se u cjelosti ili djelimično finansiraju iz budžeta Zeničko-dobojskog kantona, putem resornog ministarstva,

1x Kantonalnom sudu u Zenici, putem Ministarstva za pravosuđe i upravu,

1x Općinskim sudovima sa područja Zeničko-dobojskog kantona, putem Ministarstva za pravosuđe i upravu,

1x Kantonalnom tužilaštvu/tužiteljstvu, putem Ministarstva za pravosuđe i upravu,

1x Kantonalnom pravobranilaštvu, putem Ministarstva za pravosuđe i upravu,

1x a/a.